

**NATIONAL ASSEMBLY OF
SEYCHELLES**

*Wednesday 24th February,
2021*

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm e bonzour ankor enn fwa nou lodyans a lekout.

Nou annan *First Reading* pou 2 *Bill* e antretan nou ava apel Minis avek son delegasyon silvouple. Madanm Clerk, *First Reading*.

MADAM CLERK

Mersi Mr Speaker. Bonzour Mr Speaker, bonzour tou bann Manm e tou dimoun ki a lekout. Sa 2 *Bill* ki pe ganny prezante i *comme swivan*;

The Extradition (Amendment Bill), 2021. This Act may be cited as the Extradition (Amendment) Act, 2021 and shall come into operation on such date as the Minister may by notice in the Gazette appoint.

E lot i; *Mutual Assistance in Criminal Matters*

(Amendment) Bill, 2021. This Act may be cited as the Mutual Assistance in Criminal Matters (Amendment) Act, 2021 and shall come into operation on such date as the Minister may by notice in the Gazette appoint.

Mersi Mr Speaker.

MADAM CLERK

Mersi Madanm Clerk, e byenveni Minis Hassan e PS Thesee ankor enn fwa. E a se moman mon ava envit Minis Hassan pou prezant son repons lo deba lo *Appropriation Bill, 2021*.

MINISTER NAADIR HASSAN

Mersi Mr Speaker.

Mr Speaker,

Dirizan Lopoziyon,

Dirizan Zafer

Gouvernman,

Tou Manm Onorab,

Tou piblik ki pe ekoute, bonzour.

Mr Speaker tou dabor les mon dir mersi tou bann Manm ki'n donn zot repons lo prezantasyon Bidze 2021. Mon'n ekout byen bann komanter ek largiman ki'n ganny fer par sa bann Manm tou lede parti.

Lo en kote mon apresye repons bann Manm ki'n war vizyon e nouvo fason fer keksoz sa nouvo ladministrasyon. Zot

in realize ki Sesel pa ti pou kapab kontinyen ganny zere dan fason ki i ti pe ganny fer oparavan. Sirtou la dan sa sityasyon ekonomik grav ki nou war nou ladan. Mon mazine ki sa i anliny avek sa mazorite Seselwa ki ti vot pou en sanzman dan dernyen eleksyon.

Mr Speaker permet mwan adres enn de size pertinan ki serten Manm in leve dan zot deliberasyon.

Premyerman pandan sa 3 zour ki mon'n la pe ekout repons bann Manm, mon'n anvi pran sa moman pou mon eksplik ankor enn fwa sityasyon ekonomik nou pei.

Mon pran sa responsabilite an ka mon pa'n eksplik byen. Akoz mon santi ki i annan serten Manm ki pa konpran vre realite nou sityasyon ekonomik.

Dan mon diskour Bidze 2021 ki mon ti fer le 16 Fevriye, mon ti dir tre klerman ki lefe sa pandemik COVID-19, lo nou lekonomi Sesel pou lannen 2020 in enn pli pir ki nou'n deza eksperyanse.

Alor les mwan re eksplike dan en fason pli senp ki tou dimoun a kapab, konpran ki leta nou lekonomi e nou sityasyon finansyel.

Mr Speaker an 2008 Sesel ti anbank lo en program Reform Ekonomik avek lasistans Fon Monneter enternasyonal. Kot la lanfaz ti ganny mete lo devlopman sektor prive e redwir lenterferans Gouvernman dan aktivite ekonomik.

Nou lekonomi ti agrandi preski tou le lannen gras a larises kree par sektor prive. Sa larises in ganny partaze en pe nenport koman, san pran kont lavenir ou si vreman i annan merit dan sa lapartaz.

Sipervizyon lo fason ki sa larises ti pe ganny partaze par sa ladministrasyon avan pa ti enportan. Personn pa ti pe mazin konsekans. In annan en nespes latitid depanse, depanse e depanse.

Sa kantite depanse san kontrol pa ti pou kapab kontinyen. To ou tar nou ti pou bite e nou lekonomi ti pou tap dan dir. E se egzaktaman sa ki'n arive an Mars 2020 ler COVID-19 in tape.

Ki nou'n war, en sel kou nou lekonomi, in plonze, sektor prive in ganny tape an plen e larzan ki Gouvernman ti abitye anmase avek sa sektor pou fer so depans in redwir enormeman.

Mr Speaker sa leta lekonomi ki nou

ladministrasyon in erite. Personn pa ti pe mazin petet, aköz tou senpleman Gouvernman avan ti annan zis en plan, depan antyerman lo Sekter Tourizm. Ti napa en *plan (b)* an ka Sekter Tourizm i koule.

Alor ki pe bezwen arive la aprezan an 2021? Nou bezwen rekomanse. Parey mon ti dir dan mon diskour, sa Bidze pe met fondasyon pou en lekonomi ganny transformen kot nou pa pou met tou nou dizef dan en sel pannyen.

Wi Mr Speaker avek sa Bidze, nou pe met en nouvo fondasyon pou ki mannyer Gouvernman i zer resours sa pei. I met lanfaz lo redwir gaspiyaz, tir koripsyon ek diplikasyon dan servis piblik e transform nou lekonomi.

Dezyenmman, sa Bidze i annan bi pou permet nou retourn ver semen soustenabilite dan mwayen term, par redwir nou depans e det.

Trwazyenmman, sa Bidze i enn ki son lobzektif se pou ogmant e maksimiz prodiktivite travayer Seselwa. Kot nou kontrol rekritman bann travayer etranze, e osi par redwir lo depandans sosyal ki pa neserer. Sa i pou alors ede kree krwasans.

Koman sa Minister ki siperviz ki fason ki Gouvernman i zer larzan piblik, mon ti a kontan ganny sipor tou bann Manm dan sa demars, pou siport en Bidze ki met an plas tou ban konsep fondamantal pou fer Gouvernman vin pli efikas.

Mr Speaker sa largiman ki sa Bidze in ganny prepare lo petet, ki pe ganny anmennen par Lopozisyon i fer mon realize ki i annan serten ki pa tro konpran baz ki mannyer en Bidze i ganny prepare.

Premyerman tou laliny Bidze i ganny prepare lo bann ekspektasyon, ki ganny fer par bann teknisyen makro ekonomis. Zot pran bann prozeksyon lo bann aktivite ekonomik, e baze lo la fer bann estimasyon reveni. In toultan fer koumsa, e i pou toultan ganny fer koumsa.

Sanmenm sa dan milye lannen nou fer en *mid-year review* e aziste Bidze pou reflekte devlopman dan lannen. Sa lannen sa legzersis pou pli enportan aköz lensertitid ki annan dan lekonomi.

Me kantmenm i annan lensertitid ou touzour bezwen annan en plan. Si ou napa en tel plan, ou pou zis fer parey ladministrasyon avan kot lo

petet i ti vin avek bann program parey *FA4JR*.

Ti napa okenn lezot plan alternativ ki mannyer pou soutenir sa lasistans, e ki mannyer pou relans nou lekonomi. Pourtan ansyen Gouvernman ti annan en plan an devlopman stratezik enternasyonal ki sipoze annan bann plan devlopman pou Sesel.

Gouvernman avan pa'n enterese pou al get dan sa bann plan oubyen menm reviz li. Ki bann profesyonnel ki ti pe travay lo la pou pran aksyon, ki ozordi nou pa ti pou'n plonz dan sa kriz ki nou ladan.

Me sa nouvo ladministrasyon in vin avek en plan. I pa en plan perfe. Sa pa egziste dan en lanvironnman ekonomik ki annan sitan lensertitid, me toudmenm i en plan.

En plan ki'n fini komans enplimante: en plan ki met lanfaz lo re louvertir nou marse tourizm ki dousman, dousman a rebran e soulaz nou lekonomi. E la mon pou repete ki Sekter Tourizm pou reste pilye nou lekonomi, akoz tou son lenfrastruktir in fini etabli.

Me de plis ki sa, nou plan ki nou pe vin avek i al pli lwen ki sa. I regarde ki mannyer pou lans lezot sekter nou lekonomi.

Bann sekter ki ti'n devret toultan kle dan nou Lekonomi. Tel parey Lapes ek Lagrikiltir, ki pandan 43an in deteryore.

Dan Sekter Lagrikiltir sa Minister i annan son plan byen detaye. Mon rezet alegasyon ki'n ganny fer dan sa Lasanble ki dir ki se selman gro biznes lagrikiltir ki pou benefisyé.

Nou Gouvernman pe donn tou loportinite, tou fermye. Nou pa pe gete ki groser ou ete, sa ki nou enterese avek se war nou bann fermye pe fer zot biznes agrandi e devlope e fourni nou pei avek ase prodwir pou nou kapab vin otosifizan dan serten prodwi.

Fasilite *loan* in deza an plas pou ed fermye komans zot laferm e agrandi. Gouvernman pou retir restriksyon lo prodiksyon poul kot teren i permet, pou bann biznes ou endividi ki ogmant zot prodiksyon.

Fer omwen 2 laferm *parent stock* pou prodiksyon dizef, pou kapab koup lo pri pti poul. E permet osi sa ki anvi zer bann sant zenetik pou koson, an plis ki met an plas striktir pou siport zenn antre dan sa sekter.

Dan Sekter Lapes nou'n anons en seri proze, sirtou lenfrastruktir ki pou donn valer sa lendistri e devlop li, pour ki

nou ganny plis larzan. Sa i posibil.

An plis ki sa nou pe regard bann sekter ki dan sa *digital age*, i kapab revolisyonn nou lekonomi e fason fer keksoz. Sa se servis finansyel e *digital* ekonom.

Nou'n osi met an plas fondasyon pou asire ki Gouvernman i depans dapre son mwayen, e asire ki nou retourn ver en Bidze sirplis e en det soutenab.

Mr Speaker sa i pa zis en *plan A*. Sa i en plan konpreansiv. Sa Bidze pa pe fer provizyon pou zis en *plan A* me pou en *plan B* e menm en *plan C*.

Mr Speaker i annan Manm ki'n kestyonn oubyen eksprim dout, si vreman Gouvernman pou ganny sa bann don ki annan dan Bidze.

Les mon dir klerman ki wi, sa bann don i garanti. Akoz mon dir sa? Se tou senpleman akoz avan ki sa Gouvernman i al rod okenn don, i fer sir ki i annan bon preparasyon.

In annan bann don ki ladministrasyon avan i gannyen, me pa'n kapab servi, akoz zisteman zot ti napa en plan. Sa bann don pe zis asize e pa ganny servi. Me nou, nou pou servi.

Ou ava mazine ki dan mon ladres Bidze mon ti dir ki nou bezwen kapab planifye koman en pei, e tou bann Minister ek departman i bezwen annan sa responsabilite pou met sa anmars.

Nou bezwen adopte en lapros kot nou planifye avan nou depanse. Se zisteman sa lapros ki nou Gouvernman in swazir pou adopte. Nou planifye, rod don, e apre depanse.

Enn bann laliny depans ki Gouvernman in dir i pe al regarde, se lofis ki Gouvernman i lwe. Wi mon'n fer sorti ki nou depans tro bokou dan lwe lofis. Mon'n fer en lapel avek bann propriyeter prive pou fer desann lwaye.

Mon'n fer sa lapel ziska ki Gouvernman i kapab konstrir en *Government House*. E finansman sa proze pou fer avek zisteman en don. Sa ava redwir kantite larzan ki Gouvernman i depanse pou lwe lofis.

Mr Speaker in osi annan bokou kontradiksyon dan bann repons lo sa ki konsern Bidze pou proze kapital. Prensip sa Bidze parey mon'n dir, se pou permet bann proze ki'n deza komanse kontinyen, e finans selman serten lezot proze tre enportan pou pei.

Avek kontrent fiskal, nou pa kapab fer plis. Me parkont nou osi pa kapab pa fer okenn proze kapital. Dan en peryod kriz, proze kapital pa tro kapab neserman ganny tro konpromize. Menm si sa i ennler bann pratik dan en tel sirkonstans.

Gouvernman i bezwen permet serten bann proze pou ganny fer, ki omwen sa sekter aktiv i a ede kree krwasans, an vi ki aktivite e krwasans dan lezot sekter pe redwir e kontrakte.

An menm tan nou osi pa pe kapab les nou bann lenfrastruktir deteryore. Sa i alors en balans delika. Se sa balans ki sa Gouvernman pe fer Mr Speaker, par propoz sa Bidze.

Mr Speaker sa size *FA4JR* in kontinyen monte dan sa deba lo Bidze. Lo kote Lopozisyon mon'n tann zot dir pa koup *FA4JR*, kontinyen avek.

Zis lannen pase ant Avril ziska Desanm sa program in kout Gouvernman R1.2bilyon. Larzan ki Gouvernman in bezwen prete, aköz i ti napa. Me ziska ki tan Gouvernman pou kontinyen andet pei?

Parey mon'n dir pli boner, konseps sa program depi lo konmansman ti baze lo en lekspektasyon 'petet.' Ti napa

en plan konkret e konpreansiv, aköz petet sa ladministrasyon avan ti krwar *COVID-19* pou al zis pou 3mwan. *FA4JR* i en legzanp tipik en program ki son preparasyon in baze lo 'petet.'

Me tousala de kote, i reste largiman ki serten Manm pa oule mon koup *FA4JR*. Me dan sa menm largiman zot pe dir ki nou pa pou anmas ase reveni. e ki marse finansyer domestik napa ase larzan pou Gouvernman al prete pou finans sa Bidze. Mr Speaker konmsi Angle i dir "*the figures do not add up.*"

Mr Speaker sa bann tel largiman i fer mon tonm lo en sel konklizyon. Ki Lopozisyon napa ni en *plan A*, ni en *plan B*. Toudmenm mon pou dakor avek Onorab Churchill Gill e serten lezot Manm, ki sekter prive i bezwen sipor dan sa moman difisil.

I pou sa rezon ki i annan 3 *Scheme Concessionary Loans* ki'n ganny met an plas pou siport bann biznes. Sa i *Private Sector Relief Scheme* ki pe target bann pri e mwayen lantrepriz.

Sa menm *Scheme* in osi annan menm fasilite pou bann pli gro biznes. E i osi annan sa *Scheme* ki'n ganny mete anba *DBS* pou bann biznes ki annan en *turnover* mwens ki R2bilyon.

Ankor mon dakor ki a bann *Scheme* pa pe mars parey i devret, e biznes pe ganny difikilte pou ganny sa *loan*. Gouvernman in demann avek Labank Santral pou rezourd sa ban difikilte ansanm ek bann labank komersyal ek sekter prive. Bann labank i devret realize ki i osi dan zot lentera pou asiste biznes dan sa moman difisil.

Mr Speaker dan mon ladres mon ti fer kler ki vizyon sa Gouvernman, se pou plas Seselwa dan lanplwa e ki zot pou annan priyorite lo etranze.

Sa pou reste labaz okenn nouvo rekritman dan pei. Me an menm tan nou bezwen tonm lo en konpromi, lo sa size travayer etranze, aköz i pou annan leka kot pou napa Seselwa pou fer en louvraz ki ter spesifik. Nou bezwen rod en *middle ground*.

Prosedir pou *GOP* konmela i tre kler, en anplwayer i bezwen prouve ki i vremen napa en Seselwa ki kapab fer sa louvraz. Enn fwa ki in ganny sa *GOP* sa anplwayer i bezwen annan en *succession plan* pou ranplas sa etranze.

Mr Speaker Gouvernman i serye lo ranplas travayer etranze avek Seselwa. Nou pou fer li dan en fason striktire, annord e kler pou tou dimoun konpran. Minister Lanplwa pe

an se moman asiste en stratezi kot tou biznes ki annan plas travay, i bezwen notifie sa Minister.

Ziska prezan 40 lorganizasyon travay in anrezistre e ziska le 22 Fevriye, sa Minister in resevwar 1093 lavertisman pou plas travay.

Mr Speaker in annan en pe konsern ki'n ganny releve, lo serten lotel ki pe anmenn travayer etranze. Les mwan adres sa size. Gouvernman oparavan pa'n annan en Polisi met travayer Seselwa premye.

Nou ladministrasyon pe sanz sa. Me sa i tout en negosyasyon, aköz i annan plizyer bann Lagreman Lenvestisman ki ansyen Gouvernman in sinyen, ki donn serten garanti pou sa bann lotel. Tousala nou bezwen re negosye e sa bann negosyasyon i pozitiv.

Mon repete sa Gouvernman pou ranvers Polisi ansyen administrasyon e met Seselwa premye. Me la mon osi anvi fer en lapel ek nou pep, labi sibstans in vin en problem serye dan nou pei. Dan bann rekritman ki pe ganny fer bokou in teste pozitiv pou bann sibstans ilegal.

Annou pran nou responsabilite e asire ki napa okenn keksoz, ki anpes nou

ganny en lanplwa. Kant a sa kestyon ki si annan en alokasyon Bidze pour *reskilling*? Larepons i wi. Pour sa lannen Minister Lanplwa in ganny en sonm R4.14milyon pour *reskilling*.

Mr Speaker, ler nou pe koz plas Seselwa dan en lanplwa, les mwan koz lo sa size lasistans sosyal. Lasistans sosyal i en term ki'n ganny mansyonnen bokou dan sa deba. Mon'n ekout byen sa bann largiman. E mon'n menm bezwen al reget bann sif dan Bidze pou regarde si i annan en laliny pou lasistans sosyal.

Wi, Mr Speaker sa Gouvernman in mete en sonm pou bann program sosyal. Sa sonm i *comme swivan*:

R77.7milyon pou *Social Welfare Assistance*.

R279 milyon pou *home carer*.

E R485milyon pou Program Sosyal Gouvernman, ki konpri lasistans pou bann lorganizasyon Non-gouvernmental e bann *Scheme* pou bann pti e mwayen lantrepriz. E *subsidy* pou *Housing Financing Scheme*, parmi lezot.

Annefe sa Bidze i reste pli gro sonm dan Bidze 2021. Alors Gouvernman i krwar dan prensip pou asiste bann ki

devret ganny asiste. Me ki i pa krwar, se dan abiz sistenm lasistans sosyal. Sa Gouvernman i krwar ki lasistans sosyal i pou bann ki vremen merite.

Sistenm pou lasistans sosyal pour bann ki ganny fer *redundant* pou mars *comme swivan*;

En dimoun ki ganny fer *redundant* ouswa ki napa en lanplwa, pou bezwen anrezistre avek Departman Lanplwa pour en louvraz. La i ava ganny asiste pour li ganny en louvraz.

Se selman apre ki in sey rod en louvraz e i pa'n gannyen ki la i pou kapab reklanm lasistans sosyal. Me sa ki osi enportan se ki sa dimoun pou bezwen reste koman en *active job seeker*, pour li kapab kontinyen ganny lasistans sosyal. Sa i vedir ki en dimoun ki refiz en louvraz, pa pou kapab reklanm lasistans. I osi senp ki sa.

Akoz sa nouvo sistenm, Mr Speaker? Sa i anliny avek vizyon sa nouvo Gouvernman pou anmenn en pep ki responsab pour son prop lekor e non, pa enn ki depandan lo Leta pou okip li.

Dan tousala, annou pa oublie ki se avek larzan *tax payers* ki Gouvernman i ganny larzan pou pey bann program

sosyal. Eski i normal ki en travayer i leve bomaten pou al travay, e pey son taks, me lo lot kote i annan en group ki menm si i ganny ofer en louvraz i pa pran, me selman i oule depann lo Leta?

Sa larzan lasistans sosyal i larzan *tax payers* ki pe travay dir dan sa pei. Alor nou tou nou bezwen kontribye ler nou kapab.

Mr Speaker, mon mazine sa i bann prensip ki *Chairman FPAC* i devret apresye dan son lalit, pou asire ki *tax payers money* i ganny depanse dan en fason apropiye, kot dimoun ki merit sa lasistans i gannyen.

Mr Speaker, mon'n ganny *challenge* la dan sa Lasanble pou pa zis fer lakizasyon labi, me pou montre laprev. Mon pe dir ankor enn fwa ki in annan bokou labi kot *ASP*. Sa i pa selman mon pwennvi personnel.

Me i baze lo bann diferan rapor odit ki *Internal Audit* dan Minister Finans osi byen ki Biro Oditer Zeneral in fer. Sa i bann fe, i pa zis en lopinyon. Ti napa ditou kontrol dan sa lazans, e sa in fer li posib pou annan bann diferan ka frod ki'n arive.

Mr Speaker annefe depi lannen 2010 in annan pros en dizenn ka ki Minister Finans in met avek Departman Lapolis

ouswa *ACCS* li menm, me ki'n napa okenn gran lentere pou adres sa bann ka vol dan larzan piblik.

Gouvernman avan, pan osi forseman enterese pou vwar sa bann ka i ganny pourswiv. Alors eski sa i zis en lakizasyon? Eski sa i pa demontre ki mannyer sa Gouvernman avan in iresponsab?

Avek tou bann odit ki'n ganny fer, mon lans en lapel ki *ACCS* i fer son louvraz pou finalman pran aksyon ek bann ki responsab. E mon osi lans en lapel avek *Leader* Lopozisyon, pou servi son rol koman *Chairman FPAC*, pou regarde ki mannyer en ansyen ladministrasyon, in kapab les en antite Gouvernman sitan enportan kapab fonksyonnen san kontrol? Sa nouvo ladministrasyon pou met lord dan *ASP* e asire ki larzan *tax payers* i ganny depanse dan en fason apropiye.

Mr Speaker, ler mon pe koz lo lasistans sosyal, otomatikman sa term dimoun ki vilnerab oubyen pov i monte. In annan en kantite lenstans pandan sa deba ki sa de term in ganny servi, pou dekrir nou popilasyon.

In annan Onorab ki'n koz fortman ki sa Bidze pe target zis

bann dimoun vilnerab. Parol kin ganny dir se pe pran avek sa ki pov e donn avek sa ki pli ris, ouswa nou pe redwir taks lo bann ris, me bann pov pou vin pli pov.

Les mwan fer en keksoz tre kler. Rediksyon lo taks pour bann biznes pou fer en sel keksoz. Dan sa moman difisil bann biznes i ganny serten lespas pou manivre. Zot pey mwens taks, ki ava ed zot pou sirviv dan sa peryod.

Annou pa fer sa fot pou atak sekter prive. Sekter Prive i bezwen sirviv aköz se zot, ki moter nou lekonomi. Se zot, ki kree larises dan pei. Se zot ki furni Gouvernman avek reveni, atraver zot kontribisyon taks, e lezot depans ki zot fer dan lekonomi.

Ler en biznes i ganny en rediksyon dan taks, sa i permet li pou reenvestir pour li kapab grandi. Avek lagrandisman en biznes, i vedir pou annan kreasyon plis lanplwa. En dimoun ki pe rod en travay oubyen en dimoun ki ti pe depann lo lasistans sosyal i ganny anploye. Son depandans lo Leta i nepli.

Alor, vizyon sa Gouvernman se pou nepli annan dimoun vilnerab, aköz tou senpleman nou oule ekip

dimoun pou zot vin depandan lo zot prop lekor.

Nou, nou oule ki dimoun i ganny mete dan en lanplwa, pour ki i travay pou ganny son prop reveni, san ki i depann lo personn.

Ki pli gran lafyerte ki nou dimoun i annan, ler i konnen ki lafen di mwan i pe ganny en saler, olye ki en benefis sosyal. Nou prensip se pou fer dimoun aprann lapes, pour ki zot apre al lapes, olye zis donn zot pwason. Nou pe respekte dignite nou dimoun, ler nou donn zot sans pou al debourye.

Nou bi, se pou rann dimoun zot dignite, par tir zot dan sa klasifikasyon vilnerab oubyen pov. Nou oule en popilasyon travayan. Nou oule ki nou popilasyon i ganny son laliberte ekonomik. Mr Speaker, i pa byen ki nou fer nou popilasyon vin depandan. Sa i pa en fason viv.

Mr Speaker, mon santi ki bann Manm Lopozisyon in konfize bokou lo ki mannyer en sistenm taks i fonksyonnen e zot pe kree en persepsyon, ki nou pe kree en laklas travayer ek en laklas milyonner. Mon kapab dekrir en tel persepsyon koman iresponsab e danzere. Sa i en lesey pou kree divizyon e enstabilite dan nou pei!

Nou bezwen edik nou lekòr lo ki manyèr sistèm taks i marse e ki manyèr ou servi en sistèm pou pèmèt lekònomi agrandi: kreye loubraz ek larises. Les mwan eksplik zot ki lentansyon sa nouvo rezim taks. I bi Gouvènman ki tou dimoun i pey mwens taks. Annefe, sa i ava osi ede a long term pou redwir kou lavi.

Rapor ki ansyen Gouvènman ti komisyonnen avek *OECD*, in prouve ki Sesel i annan en bann to rezim taks pli o dan lemond. Sa rapor in osi trouve ki zis en pti pousantaz dimoun ki kontribye avek taks dan sa pei.

Sa Mr Speaker, i en fe, me pa en persepsyon! Alors sa Gouvènman pou non selman ogmant lakantite biznes ki pey taks. Me osi redwir sa taks ki zot peye. Sa *savings* ki zot fer i ava pèmèt zot agrandi e anploy plis travayer e kreye plis larises pour pei ek son pep.

Mon dakor, sa nouvo prensip i diferan ek prensip Gouvènman avan, ki li, son stratezi se kreye bann gro, gro pozisyon dan sekter piblik e anmas plis taks pou soutenir sa. Mr Speaker, sa i pa en stratezi ki soutenab.

Bokou bann pei ki'n vremen fer sikse tel ki *Singapore* ek *Hong Kong* in swiv

bann stratezi parey, ki sa nouvo Gouvènman pe adopte.

Mr Speaker, bokou in ganny dir lo size koripsyon. Mwan, mon annan en sel keksoz pou dir. Sa Gouvènman pa pou toler koripsyon!

(APPLAUSE)

MINISTER NAADIR HASSAN

Me la mon anvoy en mesaz for e kler avek Komisyon Anti-Koripsyon. Tou lobstak in ganny tire dan zot semen. Resours in ganny donner, Lalwa amande e travayer ki fer lanket in ganny donner.

Nepli annan leskiz pou pa delivre. Gouvènman ek Lepep Seselwa i ekspekte zot delivre lo zot manda. I pa akseptab ki ziska prezan napa ni enn ka koripsyon ki'n ganny anmennen devan Lakour pour prosekisyon!

(APPLAUSE)

MINISTER NAADIR HASSAN

Mr Speaker, in annan osi en kantite ki'n ganny dir dan sa Lasanble, ki mon pou senpleman dekrir koman *fake news*. Savedir i fo. In annan ki dir ki Gouvènman pa pe donn labours. Sa i fo.

Mr Speaker Gouvènman in met en sonm R302milyon

pou asiste bann etidyan ek zot letid avanse. Sa sonm i menm plis ki lannen pase, kot ti annan en sonm R196milyon.

La, les mwan dir ki sa sonm a permet bann etidyan ki ti sipoze al zot letid an 2020, e bann ki pou ale sa lannen, 2021, konmans zot letid iniversiter.

Konsernan labours, mon ti a swete met devan zot en lot konsern, kot nou'n perdi bann labours akoz sa Gouvernman oparavan pan zer byen bann kado, ki donn loportinite nou bann etidyan pou etidye aletranze.

Annefe bokou bann *scholarship* ki nou'n gannyen, avek bann pei, tel ki *UAE*, pa'n zanmen ganny distribye avek nou bann etidyan. Sa Gouvernman pou fer sir ki ler nou ganny bann kado labours ki sitan presye, nou servi li pou benefisyen nou bann etidyan.

In annan bann komanter ki'n dir ler en dimoun pa kapab ganny en travay, i pa pou ganny lasistans sosyal. Sa i fo, Mr Speaker.

In ganny dir ki *part rental* in ganny aboli. Sa i fo, Mr Speaker. Dernyen peyman ki *ASP* pou fer set an Mars. Apre sa program pou ganny zere par Minister Lakaz ek Later.

Mr Speaker, pou annan serten reform, kot pou annan *capping* lo nivo saler, ek *capping* lo lasistans, ki en dimoun pou kapab gannyen.

Mr Speaker avek sistenm aktyel, kot ti napa okenn kontrol, en aplikan *part rental* ti kapab ganny ziska R20mil lasistans pou pey lakaz lwe. In ganny dir ki *allowance COVID-19* pour bann travayer Lasante pe ganny aboli. Sa i fo, Mr Speaker.

Nou pou kontinyen avek sa *allowance*, akoz nou rekonnet valer travayer Lasante dan sa pandemik. In ganny dir ki pou napa *long service allowance*. Sa i fo, Mr Speaker. Nou'n dir ki pou napa logmantasyon zis pour sa lannen. Lannen prosenn nou a revwar ler lekonomi i rebran. Menm zafer i aplik pour logmantasyon saler. Tousala Mr Speaker i fo. Tou larestan lasistans ek *allowance* ki Gouvernman i donnen, pou reste parey.

Mr Speaker in annan kin demande si in annan *savings*, avek sa nouvo laranzman ki Gouvernman i annan aprean avek Lotel *Berjaya Beau Vallon Bay*. Mon kapab dir avek sa Lasanble, ki wi, in annan *savings*.

Zis pour mwan Zanvye, Gouvernman in pey Selman 668,43.68sou. Sa i zis peyman pour: 90poursan elekrisite, delo, karbiran ek gas. Nou pey bil enternet, telefonn ek televizyon. Tandis ki sonm pli o ki nou'n pey lotel Berjaya Beau Vallon Bay anba Gouvernman avan, i R6.44milyon pour mwan Oktob.

Sa peyman ti pour: R835 par lasanm par zour, 90poursan elekrisite, delo, karbiran ek gas ek bil enternet, telefonn ek televizyon. Alor, gete pour zot menm ki kantite *savings* nou Gouvernman in reisir gannyen?

Lo kote bann kontra sekirite oubyen netwayaz ki mon'n koz lo la, e ki serten Manm Lasanble in fini tonm lo zot prop konklizyon. Stratezi Gouvernman se pou revwar prosedir prokirman, pour ki Gouvernman i ganny valer pour larzan.

Sa larzan ki nou pe depanse lo sa kantite kontra nou kolekte avek *tax payers* Seselwa, Mr Speaker. Mon rezet alegasyon ki'n ganny fer par Lopoziyon ki sa revizyon dan fason ki kontra sekirite pou fer, pe ganny fer dan lavantaz Minis Fonseka.

Nou pou fer sa ki nou apel en *security risk assessment*, ki

a permet nou vwar ki pli bon fason pou redwir sa sonm ki nou depanse toulezan lo sekirite, san ki nou konpromi sekirite fasilite Gouvernman.

Menm zafer pou aplik pour bann kontra netwayaz. Sa zafer kas, kas kontra an pti morso, i kout *tax payers* bokou plis. La ankor pa zis bann gro biznes ki pe ganny targete. Mon repete bi nou Gouvernman se pou kree sa lanvironnman ideal pour tou biznes agrandi.

Mr Speaker, mon'n byen apresye lapel Onorab Naddy Zialor, pour ki Gouvernman i donn plis latansyon bann dimoun avek en dezabilite. Onorab Zialor in fer referans avek zis bann nouvo bis ki *SPTC* pou gannyen.

Me mwan mon krwar nou devret al pli lwen ki sa. Nou devret fer en zefor ekstra pou obliz tou nouvo konstrikasyon piblik, pou met fasilite pour ki dimoun ki annan en dezabilite fizik i kapab ganny akse avek.

(APPLAUSE)

MINISTER NAADIR HASSAN

En tel lapros i a permet sa bann dimoun pou vin endepandan, ki zot a kapab deplase lo zot menm, konmansman par bann bis ki servis piblik i donner.

Mon pou debout for ki konstriksyon *Government House* i annan sa bann akse.

Mr Speaker, an sa ki konsern devlopman sit Bazar Labrin, ki Onorab John Hoareau in souleve, mon anvî reasir Onorab ki sa devlopman pou kontinyen. Pour le moman, sa sit i anba responsabilite Minister Lakaz ek Later.

Zot pou revwar sa bann plan devlopman inisyâl, ki apre zot kapab fer en propozisyon avek Konsey Minis. Mon oule reasir Onorab Hoareau, si i annan okenn sanzman dan sa plan, Gouvernman pou antre an konsiltasyon avek bann partner dan sa distrik.

Mr Speaker, in annan en kantite lezot pwen leklersisman lo bann diferan Minister, Departman ek Lazans, ki bann Manm in demande. Mon ti a zis port a zot latansyon pou gard sa bann kestyon, pour ler sa bann antite in vin defann zot Bidze.

Mr Speaker, a sa pwen mon anvî felisit sa tim teknisyen kot Minister Finans ek Planifikasyon Ekonomik, ki'n fer en louvraz fantastik pou prepar sa Bidze dan en dele letan ki ti vreman sere.

Kantmenm in annan ki'n kritik zot pou en Bidze ki vag, e baze lo petet, mwan koman en ekonomis mon konnen ki sa

zefor zot in mete dan preparasyon sa Bidze, e zot profesyonnalizm ki zot in montre.

Sesel i annan bann profesyonnel ki annan tala. E anba sa ladministrasyon zot pou ganny tou loportinite, pou demontre zot talan. Bann letan kot bann politisyen ti pran desizyon, apre teknisyen ti bezwen taye pou fer analiz sa bann desizyon in fini!

Koman en Minis ki ankor en teknokrat a ker, mon donn zot mon langazman lo la. Bann letan parey kot ler zot ti sey dir ki mannyer sa *Scheme FA4JR* ti pe ganny enplimante ti mal, me zot pa ti ganny ekoute pa pou ariv ankor.

(APPLAUSE)

MINISTER NAADIR HASSAN

Mr Speaker annefe mon ti sirprann ler mon demann bann serten Polisi ek analiz, e mon donn bann teknisyen en semenn pou met pare, zot donn mwan lanmen! Ler mon demande ki mannyer zot in kapab fer sa telman vit, larepons se;

“Minis, nou'n fini fer sa louvraz depi detrwa lannen pase, me nou pa'n zanmen ganny ekoute!” Mon kont lo zot

sipor pour lenplimantasyon sa nouvo fason fer keksoz. Nou Prezidan, Mr Ramkalawan, osi in pran en lapros parey.

Par egzanp, ler bann politisyen lo Komite *Platinum* i fer bann propozisyon, Prezidan i vir ver bann profesyonnel Lasante e demann zot, zot pwennvi lo la. E se, selman apre sa, ki Komite i pran en desizyon.

Me i paret bann ki'n abitye dan bann fason fer anba administrasyon avan, pa kontan ler profesyonnel i ganny konsilte. E ler zot pa kapab donn lord bann profesyonnel, zot deside sorti lo Komite.

(APPLAUSE)

MINISTER NAADIR HASSAN

Mr Speaker, kestyon lo size *IMF*, in monte dan sa deba. Gouvernman i deza an diskisyon avek *IMF* pou re antre lo en program reform.

Antretan, Gouvernman li in konmans son prop reform restriktirasyon, sa reform pou kontinyen pandan lannen.

I enportan note la, ki ler nou pou negosye avek *IMF*, mon kontan pou dir ki sa fwasi Sesel pou pli byen prepare. Nou annan nou, nou bann zenn profesyonnel ki ti partisip dan

negosyasyon e lenplimantasyon reform 2008.

La, aprezan, zot annan sa leksperyans ek bagaz pou fer sa negosyasyon e fer bann preparasyon, ek restriktirasyon neser, avan ki nou menm antre lo sa program.

Mr Speaker, pour konklir, mon pou refer avek en konversasyon ki mon'n deza annan avek premye Sef Misyon Fon Monneter Enternasyonal, *IMF*, Mr Paul Mathieu an 2008.

Sa letan mon ti'n fek komans mon karyer e mon ti enplike dan lenplimantasyon sa Program Reform Ekonomik. Mr Mathieu ti dir ki mannyer in enpresyonnen avek Parti Lopozisyon ki sa letan ti dirize par Mr Ramkalawan, ki ti'n pare pou donn zot sipor sa program e anpese ki i annan enstabilite dan pei.

I ti dir ki sa kalite lapros i montre matirite politik Lopozisyon, ki a ede kree stabilite dan pei e fer ki sa program pou vin en sikse. Mr Speaker ozordi nou dan en sityasyon pli pir ki 2008, e pei i bezwen antre dan en reform.

Mon lekspektasyon se ki parti Lopozisyon i montre sa menm nivo matirite politik e zot lanmour pour Sesel. Mon oule fer en lapel avek Lopozisyon pou, malgre si zot pa siport sa

Gouvernman, me omwen ede pou enplimant sa reform ki son rezilta final se pou ede sov nou pei, Sesel!

Mon pe fer sa pledwaye, Mr Speaker, akoz mon ganny lenpresyon ki i annan ki anvi ki sa plan kin mon'n prezante i *fail*, zis pou zot prouv en pwen! Mr Speaker sa kalite latitud pa dan lentere nou pei.

Eski nou realize ki ler nou swet maler sa Gouvernman nou osi pe swet maler nou prop pei? Mr Speaker, apre tou, eski Sesel pa sipoze pli gran ki nou tou? Annou alors met de kote nou diferan politik, e travay nou tou ansanm pou nou sov nou pei! Si nou esey sabotaz sa Gouvernman, nou pe sabotaz nou pei.

Se selman ler nou vin ansanm ki nou pou kapab met sa fondasyon solid, pour relans e transform nou lekonomi, ki sa de lobzektif kle nou Bidze 2021.

Mr Speaker, mon demann tou bann Manm Onorab pou donn zot sipor sa Bidze 2021. Mersi Mr Speaker.

(APPLAUSE)

MR SPEAKER

Mersi Minis. Nou aprezan pran vot lo merit zeneral sa *Bill*. Bann ki an faver silvouple lev lanmen? Mersi. Okenn ki kont?

Madanm Clerk. Mon anonse ki vot lo *General Merit Appropriation Bill, 2020* in pase avek 32 vot pour, 0 vot kont e 0 abstansyon. Mersi.

(APPLAUSE)

MR SPEAKER

Madanm Clerk prezan mon ava apel ou pou *Formal Second Reading* lo sa *Bill*.

(Interruption)

MR SPEAKER

Silvouple! Silvouple! I pa ler pou bann komanter ekstra.

Madanm Clerk nou ava *proceed* avek *Second Reading*.

MADAM CLERK

Mersi Mr Speaker. *A Bill for an Act to provide for the service of the Republic of Seychelles for the year ending December 31st 2021*. Mersi Mr Speaker.

MR SPEAKER

Mersi. Nou pou al dan Staz Komite lo sa *Bill* Zedi komansman 9er.

E mon oule eksplike ki nou'n deside ki pou Staz Komite, bann Manm ki dan milye lasal pou pran zot plas labitud parey avan. Zis akoz pou rezon pratik. I tro difisil pou leve pou al lo *micro* letan ou lo

Staz Komite, kot nou bezwen fer bann kestyon referans vitman.

Alor avek sa, mon a dir Minis ek *PS* mersi bokou e nou ava *adjourn* pou Zedi.

HON SEBASTIEN PILLAY

(Off-Mic)

MR SPEAKER

Wi.

HON SEBASTIEN PILLAY

Mersi Mr Speaker e mersi Minis pou son ladres. Zis en pti pwen klarifikasyon pou nou montre Minis nou grander lespri ki malgre in maltret nou en pti git ...

MR SPEAKER

Silvouple.

HON SEBASTIEN PILLAY

... nou'n montre ki nou'n pare pou siport Bidze.

Akoz sa Bidze i annan saler tou bann travayer Seselwa ladan.

MR SPEAKER

Nou apresye.

HON SEBASTIEN PILLAY

E sa i montre nou grander lespri. Mersi Mr Speaker osi

pou ou grander lespri pou donn mon loportinite pou sa 2 pti mo.

MR SPEAKER

Mersi. Nou ava *adjourn*.

(ADJOURNMENT)